

四庫全書

史部

欽定四庫全書

廣西通志卷七十七

鄉賢

明

吳文字尚質桂林人洪武乙丑進士是年始選進士入翰林文在選中官檢討後出為湖廣右參議與湖廣右參政王景範左參議鄭暘同日陞辭上親諭以典藩之法曰卿等所學常懷致君澤民朕

今簡用特冀儒術之異於常人也勉之文到官具
錄聖諭置廳事中或有追悔則曰得無負聖諭耶
立取其事更審覈之必當乃已以政聲聞

舊志

王溥字士淵桂林人洪武間進士由郎中陞廣東
右參議興學校理冤獄時匠藝之家以勢要占役
多失業溥禁止之部檄徵舵木使者立期逼取故
格以不中民苦之溥親臨簡閱十取八九運由海
道風水漂沒民不勝困溥臨庾嶺遍觀險易鑿石

填澗修葺橋道教民造車運之具後率踰嶺浮江以達免漂沒患又議罷番禺南海兩縣歲時供帳民便之時起無糧無籍軍都司咨取甚亟溥曰一概起取賦役從何出耶得奏聞止起無籍餘皆獲免弟信來廣適承差何秀同舟知溥弟送以布衣弟至以告溥曰一衣雖微不可不慎此污行辱身之漸也命還之遣弟歸及獻績父老遮道留不能去歷官數年筭無重衣及為胥吏龐庸誣被逮下

獄行李蕭然寮屬餽贖皆辭不受曰吾豈以患難易其心哉比至得白歸卒年三十有六廣人哀之

參廣東
通志

侯禮臨桂人洪武間舉人官江西僉事坐事左遷連州判官會徭獍劫鄉村經年不能制禮躬抵賊巢諭以禍福賊率衆向化未幾復叛踞高良鄉欲攻州城禮又招徠之悉為編氓秩陞本州知州九載考績民詣闕保畱復任九年

縣志

于中字子正全州人以學行稱洪武初太守章復
舉任本府儒學訓導十五年詔有司幣聘詣闕太
祖親試授監察御史內直賦詩有太液暖風扶御
柳瀛州春日醉仙桃之句為時傳誦立朝別忠佞
不少假後以彈劾忤旨謫雲南歸化丞尋陞臨安
判放歸未半載復召詣闕廷臣交薦可大用上語
薦者曰天下平定近臣易選民牧難得當仍任有
司乃補柳州同知久之移南雄益勤撫恤隨在民

皆戴之所著有黃華山樵詩集

州志

龍淵桂平人洪武中任良鄉令以才能見推擢監

察御史陞懷慶府知府

舊志

魏垣藤縣人洪武二十四年進士歷戶刑二部主

事調桂林通判持身謹厚和易近民有善政聞於

時

縣志

莫敬山蒼梧人洪武中以明經司訓蒼梧博學善

誘掖有治才以卓異累官雲南參政

舊志

黃景信宣化人洪武中掄才不拘資格景信由監生莅官躬簿書罔敢暇逸凡吏治民情裁處允當

官至山西右布政

舊志

王顯中桂平人洪武中遊太學有聲擢交趾諒江府同知在任以勤慎著尋陞新平府知府卒於官

吏民思之

潯州府志

陳莘橫州人洪武癸酉舉人初任湖廣隨州知州修學勸士務本愛民闢田四百餘頃利及百姓後

陞交趾三江府同知

舊志

覃衡平南人由洪武丙子鄉舉為御史以直得名奏事觸怒時同奏者七人並執赴市曹衡在第二臨斬爭先曰奏自我為之他無與也人稱為忠烈

云

舊志

王敏宣化人監生洪武中擢御史克振風紀進交

趾左參議

舊志

黎天祿橫州人

一作永淳人

從父戍馴象衛洪武十七

年開科首中鄉試任工部營繕司主事有政聲奉
敕封安南賜一品服陞兩淮運使後致仕居鄉勸
化風俗務以耕讀為業

舊志

油鳳陸川人洪武二十年鄉薦授肇慶府同知永
樂中改知交趾諒江府仁惠廉明所至有政聲卒

於官

舊志

陳汝器字用之容縣人洪武中以人材授本州訓
導陶淑有方士獲造就知州王清薦其賢累官福

建按察司僉事卓有政聲

縣志

王惟道容縣人洪武間進士令黃岡學問該博政事廉明莅任六年廢修墜舉累官參政請告家居
禔躬範俗一稟先程弟惟興領鄉書刑部主事清
慎明允獄無冤滯晉本部員外有政聲以親老乞
歸屏絕干謁周賑鄉黨邑人士雅重之卒與兄惟

道並祀鄉賢

縣志

黃驥字致遠全州人品行端方洪武丙子科與臨

桂唐耕陽朔諸葛平並領鄉薦皆為名賢驥初授
沙縣教諭永樂時擢禮科給事中嘗三使西域仁
宗初上疏言西域貢使多商人假託無賴小人投
為從者乘驛傳役人運貢物至京師賞賚優厚番
人慕利貢無虛月致軍民失業妨農比其使還多
齎貨物車運至百餘輛丁男不足役及婦女所至
辱驛官鞭夫隸無敢與較者乞敕陝西行都司惟
哈密諸國王遣使入貢者許令來京止正副使得

乘驛馬陝人庶少甦至西域碣砂梧桐鱖之類皆
無益國用惟馬切邊需其餘一切勿受則來者自
稀浮費益省帝以示尚書呂震且讓之曰驥嘗奉
使悉西事卿西人顧不悉邪驥言是其即議行後
遷右通政與李琦羅汝敬撫諭交趾不辱命使還
尋卒著有黃門奏草

州志

唐耕字廣耘臨桂人與黃驥諸葛平並以才名領
洪武丙子鄉薦耕由訓導擢知河源以廉能陞監

察御史遷國子司業與修永樂大典卒於官有河
池守禦所修城記人競傳之

縣志

諸葛平陽朔人授應山縣令清徭賦後調樂會請
罷縣丞簿員樂會人曰安得慮擾民如諸葛公哉
以治行異等擢吏部主事陞郎中出為湖廣參議

縣志

陸昇字彥昇靈川人洪武中舉於鄉受分水縣丞
永樂間改臨高有循良聲時久旱焚香祝天夜夢

老嫗訴冤厥明獲詐稱牙兵者至詰之永寧鄉符
儂也因得其殺伯母狀寘之獄天大雨解學士縉
過臨高為題雪冤致雨卷及吟松詩贈之轉興隆

經歷卒

縣志

蔣穗宜山人洪武末歲貢知懷安廉介嚴謹政尚
寬簡吏弊則痛懲之嘗置三等冊立循環簿凡有
科差量圖里高下審業產輕重錙銖不爽尤畱意

學校以崇風化

舊志

陳新臨桂人洪武間任會同知縣居官公勤稍暇
召生徒講授居處蕭然不以介意縣人思之

縣志

上官謙繼陳新令會同公勤與新前後一轍衆大

悅秩滿父老請畱之後遷知壽州

舊志

岳敏字敏學臨桂人洪武庚午舉於鄉授河南道
御史陞河南副使永樂元年陞四川按察使居官

廉介卒之日家無餘物

縣志

龍韜字君畧臨桂人建文己卯舉人授浙江嘉興

推官政平訟理擢山東道監察御史激揚有聲不避權要後陞雲南按察司僉事所至著丰裁以此

招忌引疾歸尋蒙恩進階

舊志

黃安宣化人建文己卯舉人永樂間奉使交趾有功陞交趾宣化府知府後赴部考績為交道羣長吏第一尋陞湖廣參政後交人復叛安督餉道卒

縣志載永樂間授常州府知府入覲奉使云

舊志

楊寧遠容縣人建文己卯舉於鄉署廣東興寧縣

教諭歷陞戶部員外郎交趾參議清慎方嚴始終
如一致仕歸田課子孫不履公署邑之世科相繼

推楊氏云

舊志

莫卿平樂人永樂甲午舉人官廣東樂會縣知縣

救荒恤民修學重士卓有政聲

縣志

莫愚臨桂人永樂丁酉舉人以工部郎中出知常

州府令嚴肅吏不敢欺從侍郎周忱

舊志作周恂

重濬

蔡涇人獲水利奏請減宜興歲進茶時使者在外

勢橫愚奏言守令親民之官黜陟臧否出自朝廷
奉使者倚勢相傲且曰賢否在我儻若而言將必
有以廉謹者為貪污諛佞者為正直名實一清吏
治大壞請亟禁止報下吏部嚴禁愚以故安其職
秩滿郡民乞留巡撫以聞進二階復任

縣志

楊清永淳人永樂癸卯鄉薦任四川布政司理問
陞雅州知州俱有政績致仕歸專以訓誨子弟為
事子訊中式任縣宰亦有惠政人以為清之教云

縣志

周鼎岑溪人永樂辛卯舉人任南京大理評事轉
北京評事兩任刑官多所平反民以不冤稱官至

山東副使

舊志

李養博白人舉永樂鄉書授廣濟主簿寬平仁恕
秩滿邑民愛戴乞留加七品俸再任

縣志

楊宣字均政蒼梧人永樂二年進士授翰林院庶
吉士出知宜興縣廉靜勤敏利興弊革民多戴之

事母孝疾篤籲天祈以身代

舊志

龔麓蒼梧人永樂甲申進士授嘉定知縣課最擢
兵部郎中中外以循卓見稱歷陞廣東布政司參

政

舊志

李宏北流人永樂乙未進士任四川道監察御史
性剛毅有風裁嘗建言時政十事皆經國正論名

重一時

梧州府志

劉湛字嗣澄桂林人永樂十二年舉人正統間任

潮州知府時漳寇林烏鐵擁衆擾郡之三饒勢甚猖獗湛躬統民兵剿捕殆盡郡苦荒歉二年糧稅不能輸湛奏免民德之

縣志

龍歸荔浦人永樂中任南雄知事署始興招集流民令各復業豁賦累三千六十餘石

廣東名宦志

傅敬象州人永樂戊戌進士善屬文任監察御史彈劾中貴風采凜然以直見忤遂引疾歸杜門不出人不敢干以私

舊志

陶成字孔恩鬱林人永樂甲午舉於鄉授交趾鳳
山典史為尚書黃福所知亟薦之累官浙江按察
司僉事九載考績民詣闕乞留陞本司副使為人
嚴恕明直遇事敢為正統七年倭寇東海守邊三
司多懼罪自縊朝命推成整練邊務成量海寇來
風時月預布鐵蒺藜於泥中賊艤舟躍岸盡被刺
仆伏兵四合殲而焚之又奏減運京儲糧米二十
五萬石以運兵八千人沿海守禦倭由是不復寇

十三年處州賊葉宗留陳鑑胡等為變將逼金華之蘭谿蘭谿者浙門戶同官推成往成至彌月間執渠魁戮黨與數百人威聲遠震乃分遣招撫降二千餘人宗留等還遁入處及溫台山谷間時總兵官都督徐泰尚書石璞久屯無功復共推成成抵巢諭之畱七日皆感悔出降獨餘黨陶得二者竄不受招成計誘其數百人殺之生擒百餘人來降者三千餘人得二與四十餘賊更遁入山谷久

之復出猖獗來攻武義武義故無城植木為柵得
二以縕束薪使人先匿入柵中而自率衆外攻柵
成與都指揮崔源驅兵出戰自卯至申勝負未決
賊從中燒柵為內應力戰不支遂遇害時景泰元
年五月也事聞遣官祭誥贈浙江布政司左參政
官子魯新會縣丞嘉靖間從曾孫世職指揮鳳儀
請立祠廣州祀成并魯

梧州府志

李素字崇文蒼梧人永樂進士以給事中使交趾

改授贛縣知縣秩滿民詣闕乞畱者二千人復任

尋改番禺縣拊循不減於贛擢光祿卿

舊志

秦應字思敬融縣人舉永樂庚子鄉試卒業太學授江西都司斷事有富民毆人致死者撫按知應廉明屬訊卒正其罪進刑部浙江司郎中與堂官論刑或牴牾趨出次日復以舊牘進必行乃已故獄多平反出知廣平府奏罷積弊以內艱去時融田為賊據久荒民賠納租役如故服闋赴京具疏

奏蠲之補浙江嘉興府政尚嚴明奸慝屏息擢浙

江大參檄甫至卒

舊志

徐子善梧州人永樂中以太學生知保昌縣政崇簡易不尚刑刻修學校課農桑恤鰥寡利民之事

咸竭力為之

廣東名宦志

廖仕能

縣志作士能

字國卿岑溪人永樂十八年舉人

知宣城縣遠讒佞革吏弊修塘堰簡詞訟政令不

擾一境以安陞吉安通判宣人思之不忘

舊志

陸忠永淳人永樂癸卯鄉薦任福清縣丞教民開渠灌溉得以力田年老告歸鄉人小利亦賴以興

至今稱之

縣志

閉貞橫州人監生永樂間任福建惠安縣主簿廉正賢能愛民革弊邑人赴部使者請畱遂陞本縣知縣在邑久深知民間情偽及吏案宿弊不事鞭扑而令自行九年致仕民為樹德政碑又作琴堂

四美詩遺之

舊志

李觀智字克明蒼梧人永樂二十一年鄉薦入太
學授都察院司務陞山東僉事改廣東分巡嶺西
道清遠盜發捕戮之德威交著景泰四年廣東寇
起督撫王翱以觀智諳土俗委之撫諭大藤五屯

龍山諸寇悉降子廷麟廷鳳廷彪咸領鄉薦

梧州府志

廖時英藤縣人永樂間貢生學問該博制行端方

任禮部郎中居官清慎為時所重

縣志

徐賢字遂良臨桂人永樂辛卯舉人登邢寬榜進

士歷刑部郎陞廣東按察副使綽有政聲年未六

十即引疾致仕鄉人高之

縣志

李通臨桂人舉人永樂十二年知陽春縣事丰采

端厚聽斷公平民深德之

縣志

陳敏陸川人由監生司李韶州擢知儋州寬厚得
民以憂歸民遮道乞畱仍任如故九年改知泗州

儋人祀名宦

舊志

黃賢相藤縣人永樂間入太學後擢監察御史數

言時政稱旨褒賞

舊志

陶秀昭平人會昌令事親孝稟命惟謹友其弟盡以家產付之及居官或以賄入輒峻却決獄無留滯民以不冤故其子孫多顯者

縣志

莫彥樸懷集人永樂歲貢操履清慎敷政公明官

至饒州司馬

縣志

馬聰字馴良臨桂人登永樂鄉舉正統間任九江德化縣莅事勤敏首以學校農桑為務郡有甘棠

堤唐刺史李渤所築久且壞行旅畏阻一日見男
女裸體而渡聰惻然念曰此令過也遂率民往築
甃以巨石兩旁植柳護之上有煙水亭宋濂溪祠
久圯復修葺之後陞工部主事卒於官柩還道經
故治民懷其德遂迎葬於廬山之麓留其妻與子

居焉

舊志

李奉蒼梧人宣德間以舉人為鎮江通判專視馬
政懲牧者苦償不支曲為調劑以蘇其困又請減

水患租稅擢徽州同知值歲祲奉請改折漕米三萬石士庶感之嘗恐秩滿去後被讒歸賊陷蒼梧惟奉居不敢犯

縣志

劉琚字宗正臨桂人宣德七年舉人為松江推官行部使者薦其清恕召授監察御史巡視京畿摘諸權貴不法保河兩郡戚姓閭閻望風斂跡鎮守大臣為大書桂林秋月栢府春風以贈之尚書倪敬記其事久之出為陝西按察副使為怨家中傷

謫雲南景東衛經歷以老疾求去

舊志

蘇志號眉山懷集人宣德七年鄉試第一入太學
正統六年知湖廣靖州嘗興水利修學宮視民如
子不忍以事勞之十四年廣貴苗賊流劫至七里
坡將襲州城志率民兵五百人奮力與戰賊益衆
不敵死之州民思哀不置弘治元年靖州知州伍
璣具奏立祠懷邑祀鄉賢

縣志

羽尚忠岑溪人宣德間歲貢任漢中府推官補任

潮州用刑明慎獄無冤滯

縣志

羅寧岑溪人宣德間歲貢任交趾義寧府同知廉

慎有為民夷懷服

舊志

楊榮陸川人宣德舉人補瓊州府同知廉明決獄
仁惠拊民累官廣東參議復按瓊州州民祀於名

宦

舊志

伍星會字聚奎義寧人宣德十年舉人歷官陝西
道御史以敢言為時貴所嫉遂擠之外轉湖廣按

察僉事氣節凜然執法不骭尋乞歸

舊志

唐榮全州人宣德乙卯舉人正統中知仁化時縣治燬於兵榮奏徙今治創造城垣壇廟往來道路百廢俱興規畫咸當至今賴之

州志

阮敬蒼梧人舉宣德鄉書任太僕丞以直諫出為平樂丞韓襄毅開府兩粵威名藉甚敬謁以禮不少屈韓壯之薦其能擢郎署服官久清節益著

縣志

梁潔岑溪人舉宣德鄉書為普安州丞器局凝重

才識精敏從征安南有功擢守雲南多善政一時

推其治行

舊志

黃瑜字仲美臨桂人正統九年舉於鄉授兗州府同知時歲歉亟令所屬發粟賑且值水患築堤禦之陞本府知府遭喪歸適兩廣徭寇猖獗都御史葉盛請以瑜知肇慶至則剔蠹剋弊百廢漸興化所屬諸蠻聽詣郡自行首服且諭郡縣德威並濟都御史韓雍嘉其治行奏請加秩以布政司參政

掌府事先後歷十五年郡人感之

縣志

賓繼學平南人學問優贍品行端方正統戊午解
元任文選司主事公明勤慎廉介不阿銓法為之
一清尚書王鏊最器重之署其考曰名魁鄉榜行
卓士林丁內艱歸卒於家

舊志

蕭九成字子韶修仁人

舊志作義寧人
正統戊辰進士

穎悟俊拔

下筆成章正統戊午鄉薦第二庚辰登進士授戶
部主事在部敏慎利弊多所建白旋掛冠歸人益

重之

舊志

唐蔭字德盛全州人正統丁卯鄉薦歷官郴州守

治行平恕能得民報政當遷郴人請借留之尋乞

休歸盤桓松菊時論高其風概

參粵西通載

李曷永福人登正統間鄉試會求直言疏上稱旨

擢湖廣道御史有直聲官至浙江僉事

舊志

秦進字廷玉象州人正統戊午舉人幼孤服母教

性嗜學不事嬉遊初為瑞州推官訊獄明允請託

不行人咸憚之歷高肇二府通判嘗因徭寇請益軍儲盡革宿弊不畏權貴以疾歸訓二子銳欽相

繼登鄉薦

舊志

鄧洪字光大宣化人倜儻不羈童州時為邑弟子員以英敏稱初學宮在城北科第湮鬱洪白於督學使者徙置城南正統戊午貢太學及謁選吏部以優等拜南京山西道御史廉謹自持舉劾務存大體嘗奉命賚軍鳳陽人頌其公既而按直隸威

惠並行踰年卒內閣彭時銘其墓

舊志

閔悌橫州人正統中進士知桂陽專意撫循民懷其德後左遷蕭縣丞律已厚下蕭民德之奏請為

令後晉潮州府同知

舊志

萬顯字世舉藤縣人景泰元年鄉魁授封川訓導負應變才時地方寇起都御史韓雍檄領民兵防禦保障有功薦陞本縣知縣清節自堅政事克舉董築城垣盡心區畫民賴以寧

縣志

開魯橫州人景泰四年舉人任桂林府推官時平
樂徭獍跳梁當道檄魯招撫向化者萬餘人都憲
朱英開置永安州奏魯為知州任七載以守制歸
民思之不置服闋補知石屏州正德間其子克歲
薦過永安民爭相問遺送至桂林

舊志

黎暹蒼梧人景泰中舉人歷官桂林同知清簡自
立不屈於人韓督府雍初至桂誅指揮李英等四
人以警失機藩憲見之莫不長跪免冠請罪暹獨

不然雍識其能雍離桂還亦解去

縣志

李簡

舊志作李簡中

宣化人景泰癸酉舉人少剛敏任將

樂縣令三年丁外艱朝夕哀毀既葬廬墓至服闋

補高明令在任六年民懷吏畏為上官所重以考

滿歸遇宗族有爭者悉化之祀高明名宦

縣志

黎禧陽朔人景泰丙子舉人知增城縣有治才冰

檠自厲時劇賊殘破諸邑禧獻議僉憲陶魯討平

之修城興學實心實政班班可考後判瓊州

縣志

郭本字道充融縣人景泰辛未進士為監察御史
巡按浙江時奄宦恣橫本糾彈不避致中傷謫雲
南永平主簿剛直廉介拓縣治綏流夷未幾移太
平府同知久乃擢為守後以疾辭歸

舊志

費廣字隱之橫州人景泰癸酉舉人歷賓連二州
學正遷銅鼓衛教授陞南雍助教成均諸士服其
講解進修職佐郎尋致仕所至稱模楷年八十餘

卒祀鄉賢

舊志

伍璣字子玉藤縣人景泰七年舉人判福建鹽運司尋知靖州剛直廉明興廢舉墜革除煩苛教育英才後以不獲當道去民咸惜之

縣志

李時敏平樂人景泰癸酉舉人成化間知廣東信宜縣寬厚廉潔卓有實政陞化州知州民苦歲祲上官責輸甚急時敏曰使我以催科稱能如民力何疏災狀聞於上民得更生九載擢長蘆鹽運同知以目疾乞休歷官二十年家無餘貲人服其廉

化州立祠奉之平樂祀鄉賢

舊志

鄧璩宣化人景泰丙子舉於鄉任浙江衢州同知
九載矢冰檠詰奸究吏畏民懷聲播遠近陞雷州

知府

舊志

李芳字本春融縣人景泰甲戌進士知夷陵州時
州士久乏計偕芳拓州廨東建館舍取所試高等
陳銘輩會文其中親為講授以次選舉教育實多
律已清嚴而臨民平易州人歷今稱賢守以芳為

最遷貴州參議累官雲南左右布政謝病歸囊無

長物居室卑隘率子孫向學鄉里服其清德

舊志
參湖

廣通
志

焦霖字景霖靈川人年十七景泰丙子領鄉薦授
廣東布政司理問時盜賊竊發江海阨塞諸司檄
霖領視凡所獲盜情輕者宥之令聽差遣有警則
密發覘伺擒賊數百人郡境肅然陞池州丞未任

卒

縣志

蘇潤桂林人景泰中惠州府同知郡治前有交衢
雨集淖深潤出官錢甃以石達之郭外民便之博
羅長樂諸學宮久圯捐俸修葺為之一新如長沙
港蘇村堤尤為堅固其盡心勤事與民興利類如
此

舊志

歐陽伸馬平人景泰四年舉人成化中為鎮江府
推官廉潔無私讞獄平允郡有盜剽刦巡吏誣富
民若干繫獄伸歎曰為民父母忍視無辜逮死耶

遂白當道率民兵掩捕果得真盜百人民遂得釋

舊志

邢正字直夫宜山人天順間進士從戶部郎出守

廉州時廉罹兵火廬舍盡燬田土鞠為茂草正招

還流亡無美諸盜聞其恩信相率來降正區別人

數多寡給以田宅衆賴以生嘗奏革冗官豁逃絕

田糧甦困便民官至雲南參政

舊志

傅鑑藤縣人舉天順鄉書第一知欽州調靖州進

階四品操守冰檠各著惠政尤善庭訓子三皆領鄉薦著有藤縣志祀鄉賢又專祀赤水鎮解元書

院

梧州府志

蔣良字希玉全州舉人天順間任河西知縣政務長厚不樂聞人過有訟者即諭以孝弟忠信民咸

感動

州志

梁繼本字顯宗蒼梧人天順三年鄉薦判池州府

耿介不避權勢解官去甘貧約不事干謁

縣志

陳瓚永淳人監生直隸趙州判官天順間劇寇攻破縣治燒燬版籍瓚招撫逃民復業修築城垣民

賴保障

舊志

張廷綸平南人天順四年進士時兩廣弗靖謀報某村落附賊參將范信列村落名欲屠者識一白圈否者黑圈當死者無慮數千人廷綸以進士家居有奔告者即夜叩軍門告變信出見廷綸曰聞欲剪屠村落耶曰然廷綸曰不可民實不附賊公

過聽且公奉天子命將弭寇以安民今乃誣民以
為寇民不死寇即死於兵等死耳且將從賊以苟
活是驅民於賊也亂且弗戢信曰公敢保此曹果
不從賊乎廷綸曰願以家族百口保之信大屈服
立下令已其事且拜曰數千人死命賴公而生信
有死罪賴公而免敢拜公賜後為南京戶部主事

潯州府志

鄧綸灌陽人天順己卯鄉薦授湖廣湘鄉令作興

學校勸課農桑縣遇荒旱綸教民築塞陂堰創造水車四境沾溉湘鄉之民永利賴焉以親老乞歸

民不能舍立生祠復入名宦奉祀

縣志

馮俊字士彥宜山人天順庚辰進士初授刑部主事歷員外郎中折獄明信成化乙未擢福建按察副使指揮楊燧恣橫民苦之上官以其東楊之孫多庇焉民訴於俊俊自臨訊具獄論死以外艱去服闋除湖廣辰沅兵備鑿沅溪以通運道作浮橋

以通往來遷廣東布政尋陞副都御史巡撫四川
兼提督松潘諸軍事時松潘總兵恃勢不戢兵俊
劾罷之馬湖土知府安鰲殘虐一方撫按慮激變
莫敢治俊授計僉事曲銳捕鰲寘之法請更立流
官馬湖改流自俊始弘治丙辰以疾卒於官俊天
性剛毅遇事敢為在廣東時夫人吳氏為置妾俊
不內召其父母以女遣還并其奩飾與之其父母
感泣而去在蜀有知州某故人子獻徽墨數笏俊

怪其重試之乃墨塗黃金也即擲還亦不以語人
卒之日一無所有訃聞諭祭令有司營葬

舊志

宋迪字吉之賓州人天性至孝親有不悅肅衣冠
立寢門待罪必俟釋乃退天順己卯舉於鄉授雲
南廣南通判盡心民事丁父憂居喪一遵文公家
禮不尚浮屠服闋補判順寧府時甸州有大獄撫
軍檄迪決之撈獲十二屍立辨其寃咸頌神明又
卻景東土官餽金稱廉吏云

舊志

廣西通志卷七十七

欽定四庫全書

廣西通志卷七十八

鄉賢

明

秦宏桂林人景泰癸酉舉人成化初知興寧縣明
達剛介豪猾斂迹奏立城池至今賴之

縣志

宋瑚崇善人性警敏博極羣書成化戊子舉於鄉
知樂昌縣多善政歲饑民絕食瑚立法賑濟度其

地可藝麻菜令家人取種數斗給民種之菜熟活甚衆縣人德之呼為宋公菜 案舊志作蒙城令今依府志改正

陳宣字廷實義寧人以國子監生授南京中城兵馬副指揮陞西城兵馬指揮才敏志剛防禦甚嚴奸慝遁迹勲宦皆為懾服

舊志

唐博字文溥全州人成化戊子鄉薦授四川巴縣令開誠布惠準法原情民有兄弟爭產者責以大

義遂相讓而去或貧不能婚給以金又訟竊衣者訪之迫於寒給衣遣之戒勿犯相地築塘堰凡百有七十所邑人賴之

州志

邵思讓

舊志作姓王名讓

字伯禮宣化監生悃悞無華敦

宗族崇行誼任廣東番禺丞弼成邑政能辦累年未決之獄縣令重之撫按諸司破格獎異致仕歸歲舉鄉飲大賓者二十餘年壽百歲子儒儻儀咸恪承庭訓壽皆九十餘一門德壽鄉閭稱為百歲

第云

舊志

程瑄字汝玉藤縣人博學能文尤工書法景泰間應貢入胄監嘗以文章見稱歷事南臺咸見器重成化改元中丞高某薦補臺中力辭不就其恬退如此選武緣縣知縣調石城所在皆有善政人懷

其德

縣志

陶魯字自強鬱林人以父成死事廕授新會丞年二十徭賊流劫高廉惠肇諸郡將及新會魯集父

老子弟築堡砦練技勇繕甲兵復建郭掘壕布鐵
蒺藜刺竹於城外賊來犯輒擊破之巡撫葉盛上
其績就遷知縣尋以破賊功進廣州同知仍知縣
事成化二年從總督韓雍征大藤峽有功擢僉事
專治新會陽江陽春瀧水新興諸縣兵其冬會合
叅將王瑛破劇賊廖凜保等於欽化明年偕叅將
夏鑑破賊首黃公漢等於思恩潯州未幾賊陷石
康執知縣羅紳復偕鑑追擊至六菊山敗之魯以

兩廣寇盜不息奏請建總制府於梧州秩滿考課
進副使兵部尚書余子俊奏其撫輯勞勩賚金幣
二十年以征荔浦猺功增俸一級九載課最進湖
廣按察使治兵兩廣如故鬱林陸川賊黃公定胡
公明等為亂與叅將歐磐五路進討大破之毀賊
巢一百三十弘治四年總督秦紘遣平德慶猺進
湖廣左布政使兼廣東按察副使奉勅撫治兩廣
地方賊悉遁去人稱為三廣公十一年卒授其子

荆民襲錦衣副千戶魯善撫士多智計密謀迅發
動無不中歷官四十五年大小四十戰凡斬馘二
萬一千四百有奇奪還被掠及撫安復業者十三
萬七千有奇兩廣倚之如長城少丞新會知縣事
王重故老儒勉之學每晨授經史講解而後視事
重卒魯執喪盡弟子禮且資其二子又敬事陳獻
章獻章亦重之嘉靖初魯歿三十載矣新會人思

其德頌於朝賜祠祀之

梧州府志

楊護象州人成化間任臨高知縣承累任苛虐之
後政尚寬簡然能明燭下情民以訟至先得其誠
偽善惡審無大害者諭歸自思民感其言中止者
多閱數年民安訟簡以謗累去職新任梁儉來代
之日百姓如戀慈母贐者絡繹護堅拒之不去梁
曰此無所為而為者吾當一屈楊君以慰吾民乃
置一帙於門下命贐者書名須臾帙滿持以示楊
勸納所贐已而行就車老稚追送三十里梁嘆服

倣其政而行

舊志參廣
東名宦志

宋珊字宗器崇善人幼失父事母以孝聞仲兄璉
性偏急珊克恭無怠意由太學生授蒙城縣丞志
勵名節一介不苟會江北大饑奉檄賑濟區畫周
悉活饑民以萬計已而流賊四起練民兵拒敵蒙
城得全小河灣盜復熾上司檄珊帥兵討之斬首
百餘級賊遂退馳驅兵荒間以疾卒於官蒙民莫
不悲涕祀名宦案舊志列入補遺又疑即宋瑚

今照府志訂正

謝謙羅城人成化戊子舉人初任廣東韶州司李治獄多所平反歷陞浙江寧波太守尤有惠政致

仕歸一如布素士林咸推為清白

舊志

熊鑾字器之宣化人成化辛卯舉於鄉持身端謹任寧波府同知恪守官箴不激不隨奸慝盡戢歸

里後鄉族奉為儀型

舊志

張興字俊民靈川人成化辛卯舉人初任安定知

縣陞河南布政司經歷時逆瑾索賄興隨表詣京
朝賀無所與以老勒致仕瑾敗詔起諸受陷者得
奉例賜進階一級興賦性端慤取與不苟歸家守
貧如未仕時鄉人見之斂容起敬壽八十四歲縣志
陶瑄平樂人登成化賢書官四川井研令有惠政
捐俸造下關橋井研人誦焉縣志
唐勲字本孩全州人成化丁酉舉人任監利知縣
持已嚴正馭衆精詳窮鄉細民一見後再至輒呼

其姓名未嘗誤居官五年增城浚壕修儒學立社
倉清理田糧百廢俱舉冬一裘夏一葛未嘗新制

叅舊
志

黃濟橫州人成化丁酉舉於鄉任廉州府教授能
端師範創修橫州治舉祀鄉賢子文黼弘治乙卯
鄉薦任河南西華令興利革弊蜚聲遠近陞長沙

府判

舊
志

包裕字好問臨桂人成化戊戌進士由撫州推官

徵授御史有謇諤風巡按貴州後為雲南按察僉
事踰年遭喪歸復僉河南陞雲南按察副使會邊
夷叛督兵討之有功賜金鉶區畫地方事宜遺利
甚廣滇人賴之後以疾自陳致仕歸嘯歌娛志於
勢利泊如吳廷舉成雁門寄詩贈之所著有拙菴

稿

舊志

陳琬字仲廉全州人成化戊戌進士清介勤敏歷
官工部右侍郎嘗疏經理國用寬恤民隱十事以

進管易州厰草除柴夫贏餘銀不以自私卒於官

賜祭葬

州志

任穀字生之橫州人成化壬辰進士為南京戶部主事歷郎中擢福建布政司叅議先是治中歲采銀久之礦絕采無所得而叅議專督所入甚至攤償流亡者衆穀到官行視諸礦具得其狀慨然嘆曰民困至此尚復督辦以為功耶獨上章請罷之得報如所請以是為同官忌調廣東憫五羊至麟

山七驛差役浩繁增置站船十七艘有干以私者
不允遂譖於巡按以考察致仕歸郡守黃守濂嘗
稱之曰學如武庫思若湧泉士林推重晚節愈堅

嘉靖間舉祀鄉賢

舊志

陳瑤字仲華全州人成化壬辰進士事繼母孝為
蕭山萬載二縣令陞監察御史彈劾不避權要巡
按川陝大著風裁遷通政叅議尋遷右通政轉僉
都御史巡撫遼東歲荒發賑賴全活者數萬以事

忤當路謫叙州知府尋致仕

州志

陳璲字仲和瑤弟也成化間舉人任思明同知故事上官襲職必餽金璲峻却之又受牒推梧州鹽木前官率以賕敗璲獨持清謹稅倍而商悅及卒

幾不能殮

州志

張濂字仲湜平南人廷綸子也年十七登成化戊戌進士改翰林庶吉士洊歷侍讀學士侍武廟春宮講讀上登極晉學士再遷國子祭酒禮部侍郎

尋陞南京禮部尚書改戶部吏部又改兵部時言者詆深曾與逆瑾有舊好深不之辯惟引疾請歸疏十餘上始得加太子少傅賜書給驛歸仍諭有司月給廩米輿隸並廕其子深之任講官也每進講必齋戒致敬敷陳啓沃不忘規正及為祭酒毅然以師道自任課諸生不輟迨累居各部建議儲位叅贊機務皆社稷至計他如革貪橫逐遊僧及不收南戶部所發無名窖金多以寡合為人忌後

卒於家賜祭葬

潯州府志

唐漢字文煥全州人其先人遺田四十畝供子姓讀書漢曰讀書分內事何以田為盡以調宗族登成化甲午鄉榜授廣東番禺令時山賊連年肆掠至則遣諭之盜悔過境內遂安鄰邑黃馬二姓構訟十二年不決漢為白之考最入京道卒

州志

朗清字溫泉象州人成化間舉鄉試除教授遷南京都察院司務轉工部司務因劾逆瑾被譴後奉

敕命褒獎歷任兩京績著清勤

舊志

甘思召蒼梧人成化十六年舉人知大庾縣清慎
愛民人樂其平易致仕歸無一長物尚書吳獻臣

表其墓曰處存善退之風出有循良之績

縣志

張翱字鵬舉宣化人登成化鄉舉任龍門知縣崇
學校增田畝士民孚洽會逆瑾羅織天下郡縣官
遣使至龍門買藥索金翱廉無所與有富民議貸
出金者翱堅拒不聽遂忤其意解組歸家居杜門

課兒孫教鄉子弟多所成就鄉人月旦推重焉龍門志稱其有守有為不畏強禦政平治簡民咸德

之

舊志

李純桂林人成化間知鎮南州潔已恤民恥為阿

私後陞南昌知府

舊志

吳永平樂人成化間任黑鹽井提舉司井有蛟為民患永於北門作石壩鑄鐵牛鐵索各七鎮之害

遂息

縣志

蔡夔字彥章宣化人成化十六年舉人授寧都令
決繁獄釋寃民毀淫祠門絕私謁綽有清聲以艱
歸吳廷舉餞之詩曰有區旌仁政無貲復故鄉服
闋補知安遠清介如前居鄉授徒所造士登甲科
甚衆燕居獨處衣冠儼肅里中多儆之

舊志

蔣智興安人以鄉舉授德慶州同知成化十八年
署開建縣事嚴而不苛寬而有制吏畏民服興學
校修城池士民勒石紀其功

廣東名宦志

胡倬字用晦臨桂人成化二十年進士莅事警敏任戶部員外郎累抗中官下錦衣獄事白尋復官

同時稱其勁直後擢陝西僉事轉固原副使

縣志

萬祥藤縣人成化進士以御史官江西僉事明允激揚有聞於時識喻漢於童年禮劉節於落魄人

稱為知人云

舊志

甘泉桂平人成化庚子舉人授常州推官以憂歸復補蘇州清刑慎獄人無冤者征崇明海寇有功

當道交薦會勘徐府庄田觸逆瑾意遂免官養高

林壑士大夫推重之所著有東津手藁

舊志

龐經陸川人成化庚子舉人授邵武府通判署府
篆檄選所屬士子設館培植先後成進士者十人
愛民若子一郡德之後家居卒祀鄉賢邵武祀名

宦

舊志

李藩字建爵宣化人成化丙午登鄉薦任分宜學
教諭陞廣東布政司經歷改四川純厚謹默俱有

善績子洙字宗魯中戊子鄉試任惠安教諭勤於
教育得士心擢萍鄉縣令除蠹惠窮恬淡自守人

以為有父風

縣志

李嘉言桂平人成化間舉人歷官蘇州同知郡屬
糧長多逋負率賂官以免有賂嘉言千餘金者即
發之重其罪以前金償所逋負糧長惴服爭輸恐
後積弊遂清擢江西僉事見寧濠有逆志遂移疾

歸

潯州府志

曹穆字德容全州人成化庚子鄉薦授南豐訓導
令諸生悉就齋舍寢讀夜分作粥飼之貧而來學
者捐俸為助擢荆門州同知操守益勵清荆南戎
事得漏伍幾四百戶遷夷陵州守至陵見城北立
為完固明年巴東流賊起與民習戰守具賊不敢
犯境賴以安引疾歸鄉井歲饑謀於蔣太傅冕捐
資易粟就湘山大雲二寺作粥飼饑者富民從而
倣之全活無算子鶚列賢書後科甲不絕

舊志

申端

舊志作瑞

字廷晃容縣人成化十九年舉人幼孤

性孝友受業於舅讀書過目成誦以穎異聞弱冠

應南宮除知增城縣植弱鋤強百廢具舉撫按交

薦之擢吉安同知未赴卒增城老稚哀泣如所親

扶襯至容者數十人

梧州府志

蔣昇字誠之別號梅軒全州人成化辛卯舉於鄉

丁未成進士授廣東南海知縣以卓異擢南京福

建道御史累遷戶部尚書以老乞休給廩米興隸

如舊制馳驛以歸家居四年卒訃聞諭祭葬昇天
性純誠不事機械至於莅政折獄往往燭照如神
官郡縣保民如子入司臺憲鋤奸雜惡不遺餘力
事無難易一切揆之以理雖小節末務不肯或苟
議者以其言行政事無愧古人云

州志

蔣冕字敬之全州人成化丁酉鄉試第一丁未同
兄昇成進士選庶吉士授編修累官少傅兼太子
太傅戶部尚書謹身殿大學士冕清謹有器識雅

負時望近倖冒邊功大行陞賞冕及梁儲亦廕錦
衣千戶兩人力辭乃改文廕帝之以威武大將軍
行邊也冕上書力諫請治左右引導者罪不報十
四年扈帝南征倖臣請御寶空頭敕自隨冕奏格
之帝至揚州欲於南都郊天力諫乃止帝崩與楊
廷和協誅江彬世宗即位推定策功加伯爵固辭
會議大禮全疏載藝文志帝不悅遂乞休上念冕定策勲
令馳傳歸給月廩歲夫如制冕歷事兩朝持正匡

弼論者謂有古大臣風卒賜祭葬謚文定

州志

吳廷舉字獻臣蒼梧人成化丁未進士知廣東順德縣刻意恤民毀淫祠二百二十五所時兩廣都御史屠滸屬修中官先祠不可滸恚甚市舶中官市葛以二葛與之曰非產也中官大怒為縣十年乃得遷成都同知以憂去服除補松江尚書馬文升劉大夏交薦擢廣東僉事從總督潘蕃討平南海清遠諸盜歷陞廣東叅議副使條奏中官潘忠

二十罪詞侵劉瑾忠亦誣以他事逮繫詔獄劉瑾
矯旨枷於吏部前十餘日幾死戍雁門旋赦免瑾
誅復官副使擢江西參政敗華林賊丁連河又從
陳金討桃源賊平之進廣東布政以副都御史賑
湖廣饑所至皆有治績察知宸濠有異志陳江西
軍政六事為預防計及為兵部侍郎未浹旬劾諸
輔臣改南京工部隨改戶部復以右都御史巡撫
應天折豪強植貧弱禁私驛止妄費畿甸肅清尋

改南京工部尚書致仕及卒貧不能葬總督姚鏌

庀其喪隆慶中追謚清惠

梧州府志

計宗道字惟仲馬平人其先有名仲政者洪武間縣令張霖薦其才畧足制諸蠻以諸生官巡檢谿峒反者多所擒滅諸蠻皆畏之至宗道遂以文章起未冠鄉試第一成弘治進士知常熟公正敏達上官意見或異必爭執得當乃已嘗議常熟應蠲減者郡守以為不可宗道曰令誠非才安敢違農

時而忽萬人之命竟緩徵民賴以甦後轉延平同知入為戶部郎出守衡州卒初常熟桑悅自長沙改判柳州宗道相與往來質疑桑罷歸貧亡子宗道迎養於廨及沒親視斂葬之穿山篤於情誼若

此

舊志

楊霖字宗說藤縣人弘治二年以易領鄉薦授松江司訓歷大名府通判陞德州知州嘗核管糧主政貪墨及改用鎮守大璫不避權要時論重之轉

建昌府同知卒於官祀鄉賢

縣志

喻江字潮之藤縣人弘治五年舉人授浙江餘杭知縣調奉化縣鎮守市舶以和買土物為名誅求甚急江為報罷約已裕民凡相告訐誨諭而遣之所莅兩邑歷四考施澤於民最久稱循良焉監碑

致去思祀名宦

舊志

喻漢字宗之號桂泉藤縣人以儒士發解正德戊辰成進士一時知名之士無不願與之交初授行

人擢御史清我中州有獲盜功陞浙江僉憲以卓
異聞七膺薦剡轉江右憲副與李崆峒友善尋命
提督廣東學政未任卒所至執法嚴明冰檠矢操
卒時殮具不給漢兄弟四人江淮河俱舉鄉書江
為浙江兩邑循吏正德間河為大理府通判治洱
河自乘舟探淺處卓木為城以草障濶疏洩之著
令三年一濬民德之祀名宦與江漢俱祀鄉賢

梧州

府志

龍天瑞字國貞恭城人少穎異力學不輟事父母
以孝稱領歲薦授廣東南雄照磨莅政有聲從征
安南以功受賞攝連山始興縣篆清白自持歸無
餘橐後里居見學宮不利於科第願捐私第改立
遠近服其義行後曾孫時躍舉於鄉瑞年七十四
猶及見之

舊志

蒙惠蒼梧人登弘治進士知新興縣巡阡陌勸農
桑興學校勵髦士士民懷之累官興化知府

縣志

陳祿懷集人少穎異結茅齋於曲沙溪岸嘗夜讀
聞水神呼陳進士弘治庚戌登第分符劇縣擢比
部主政聽斷明決勵操守由郎中出守撫州值宸
濠之變設策相機與王文成共圖勦逆謝政家居
捐金造書舍訓後進鄉人德之

縣志

陳邦傳全州人弘治戊午舉人仕至順天府治中
丈草場奪還勲戚貂璫侵地遷雷州府同知弟邦
俸正德癸酉舉人任貴州鎮寧同知制置有方招

降普安永寧蠻多政聲

州志

莫普興業人弘治間由太學生判四川重慶府為政勤恪務持大體尤長於謀畫捕盜有方擢知雲

南劔川倜儻不羣見者稱能吏

舊志

傅獻策馬平人舉人弘治中為肇慶通判廉潔自

守遷本府同知居郡最久其清操始終如一後勘

權貴子弟不屈法竟坐罷官輿論惜之

廣東名宦志

覃彬馬平人弘治初為南平主簿性剛明勇於為

義雖勢豪不避延平守沈榮雅善彬嘗作對旌之
曰清慎持身與百姓秋毫無犯公勤敏政以一人
數事常兼蓋實錄云

舊志

翟觀臨桂人弘治二年以舉人知瀧水縣縣苦盜
觀開誠撫綏盜用解散民賴以安三年父喪歸士
民戀於朝遷肇慶通判盜尋斂迹久之以同知領
縣事建東西兩營分縣兵居守建五十九砦籍其
人為砦兵闢荒田九百頃鑿水圳四十八處縣人

頌之

舊志

韋鑾字君用橫州人弘治乙卯鄉薦歷大庾秀水訓導陞寧鄉令愛民育士恤獄緩刑民間謠曰韋明府治有理不要錢不罰紙致政歸祀鄉賢

舊志

梁高字俯之武宣人早孤性敏異領弘治乙卯鄉薦知廣東臨高縣為政清廉憲司薦其才冠十邑

尋辭歸甘貧隱居以終祀名宦

舊志

蔣曙字景明全州人弘治丙辰進士知贛縣政尚

清簡務與民休息轉南京戶部主事改浙江道監察御史未幾出知保定郡多中人第宅事屬姻連輒為牽制曙廉得其狀黥其強梗數人榜揭通衢自後諸豪稍稍引去時流寇薄城圍六日督兵城守示無戰意潛以兵要其歸路賊驚遁陞山東按察副使備兵天津上興革利弊八事悉報可秩滿調廣東按察副使陞布政司左叅政會樊家屯賊倡亂募鄉道引至賊營宣諭禍福從間道搗諸賊

巢穴內外夾攻斬獲首從賊千餘級前後紀功超
擢江西右布政使轉湖廣左轄晉都察院右副撫
治鄖陽時賊首倪道真廉欽等聚無賴子弟鑄刻
符印偽署職官攻掠郡邑曙分遣游兵潛伏要路
盡獲首領而還晉工部右侍郎特疏乞休自登第
後先世遺業悉讓諸昆季所餘祿入增置祭田采
輯諸禮為家乘所著有竹塘集

州志

莫相字廷佐興業人弘治戊午舉人任雲南知縣

累遷廣東僉事所至有聲時海寇許折桂猖獗相躬詣撫諭賊歸歎後居林下數年見之者無貴賤賢愚皆愛敬焉起為四川僉事以年老告歸

舊志

鍾英字世傑陽朔人成化戊子首舉於鄉弘治間任儋州知州公廉簡肅興利除害崇學校增田畝民蒙其利益政八年不以妻子自隨卒於官囊橐

蕭然

縣志

李信平樂人弘治甲子舉人官德安同知清介通

敏一時郡寮莫能及考績荷璽書褒寵居鄉有行

誼祀鄉賢

縣志

莫鈍字茂實荔浦人少穎敏登弘治辛酉鄉薦初

授浦江司訓遷知均州在任八年清慎如一日後

丁父憂服闋補眉州尋卒於官貧幾不能殮子砥

登正德丙子鄉科人謂廉吏之報云

縣志

石龍字美中蒼梧人領弘治鄉書性至孝以母老

不欲遠違授靈山教諭九載左遷南通州司訓尋

陞國子學正出知順德以教養惠民有冰檠聲弟

瓚領鄉書仕亦有惠政

舊志

朱塗字孔貴陽朔人弘治間進士授比部主事卓

異有聲拜雲南巡按御史雪冤剔弊臨事敢為逆

瑾竊柄塗持正不阿尋陞密雲副使卒於任官屬

入視橐無遺資至今稱廉能必曰朱御史

縣志

莫懼字義之橫州人弘治乙卯鄉薦授饒州府判

居官清謹時萬年縣新立推懼往署綜理周密恩

威並用吏畏民服尋以艱歸復授福州判草攬戶
却常例讞獄明允引疾歸居鄉落落不苟合少孤
家業統於伯兄終其身不忍分邦人重之

舊志

石邦柱字安國蒼梧人弘治壬戌進士知南海遭
喪歸士民走督府白其治行乞畱服闋知蕭縣盜
王浩者健猾莫可得邦柱設法擒之遷知郴州時
徭與流賊間比為亂邦柱撫諭徭使各安業賊勢
孤發兵往捕多所斬獲移丞長沙清王府占田擒

巨盜徐紹等陞南京戶部郎丁憂復補工部郎忤
執政意出守瑞州尋以疾罷歸建龍泉書院教族
人與鄉子弟置田院中年八十卒鄉人營景賢祠

祀之

縣志

劉天麒字仁徵臨桂人弘治壬戌進士為工部都
水主事分司呂梁正德初閩人擅勢有自南都詣
北者舟經呂梁天麒不為禮及橫索頗裁抑之其
人怒詬去入奏上遣官校往逮繫錦衣獄拷掠備

至卒不服乃謫安莊驛丞未幾主事王守仁亦以
事謫龍場驛丞至則與天麒定交後天麒病卒守
仁為文祭之嘉靖初詔復其官仍賜諭祭

縣志

郭興儒平南人弘治間任澄邁主簿政多惠澤值
黎寇亂率民協征以首功蒙上賞秩滿去任泣送
者載道

潯州府志

唐夔全州人弘治庚戌進士知新昌每聽訟洞燭

幽隱時稱神明

浙江名宦志

李喬木字惟遷蒼梧人正德二年舉人授潮州推官治獄明允擒歸善及石硯盤古等寇督撫王守仁薦為南寧同知歷官工部員外

縣志

龍璿容縣人正德五年丞博羅時洪溪諸峒賊構亂璿主捕詰單騎詣賊砦賊驚因堅壁鼓譟以恐之璿不為動諭以禍福賊開門迎降自後無敢肆掠者又嘗主催科一無所私卒於官無以為歸計

舊志

覃德玉容縣人本千戶所諳達軍務正德間妖賊
李通寶作亂捕斬之嗣以征永安西融功陞指揮
僉事嘉靖間剿七山征黑四多出奇謀以殄元寇
遠邇膽落鄉人立廟以祀

縣志

毛鵠賀縣人領鄉薦正德六年授湖廣瀏陽知縣
賦重民梗鵠至釐宿弊定差徭清匿稅建龜山書
院擒卜易巨寇陞廣東高州通判巡撫都御史楊
旦委征連陽擒斬賊首王貴等千餘名陞俸一級

征恩平擒斬賊首蘇萬里等尋陞儋州知州編高
雷瓊三府均徭及議瓊州十三州縣里甲直錢軍
需則例清儋州無徵米一千七百石有奇辛巳都
御史蕭翀委征開建上下銅針及賀縣都閭石牛
等寨獲百餘功嘉靖初都御史張嶺取赴軍門尋
薦之領兵抵蒼梧滑水巢奪回擄去男婦頭畜征
陽江那乾那岳斗門等寨擒斬賊首戚仙攻新寧
黃蛇圃水新興雲扶等巢斬獲皆以千計三年提

督二陽高恩寧電六縣兵事陞雷州府同知仍提督四年御史盛應期委修哨船二百艘哨岑溪肇慶平樂上自府江下至官窑江道肅清進階從四

品致仕歸壽七十終

節舊志

潘海字伯川武緣人正德十四年以監生知封川縣廉平不苛節用愛民撫綏流亡民賴安集未幾致仕士民乞留家居崇儉約寬洪待人公庭罕至

鄉閭以為儀表

思恩府志

沈希儀字唐佐貴縣人嗣世職為奉議衛指揮使
機警有膽勇智計絕人正德十二年調征永安以
數百人擣陳村砦馬陷淖中騰而上連戢三酋破
其餘衆進署指揮僉事義寧賊寇臨桂希儀追之
巢有兩隘賊伏兵其一使熟徭給官兵入希儀策
其詐急從別隘直抵賊巢賊倉卒還救遂大破之
駐白面砦待其歸砦去蛟龍滑石兩灘各數里希
儀以滑石灘狹雖衆可薄欲誘致之乃樹旗蛟龍

灘守以羸卒燃柴以疑之賊果趨滑石希儀預以
小艦載勁卒伏葭葦中賊渡且半乘龍急衝之兩
岸軍譟而前賊衆多墜水死收所掠而還從副總
兵張祐連破臨桂灌陽古田賊進署指揮同知掌
都使司事嘉靖五年總督姚鏌討田州岑猛分兵
五哨進攻堯賊要地聚衆守之希儀夜遣軍三百
人緣山上繞出其背比明合戰則所遣軍已立幟
山巔賊大潰敗猛走歸順希儀先用計間岑璋使

執猛田州平希儀功最隨改右江柳慶叅將駐柳
州柳在萬山中官軍素罷賊耳目徧官府閭閻動
靜無不知希儀請於制府調那地狼兵二千來戍
兵稍振乃求得與徭通販易者數十人持其罪而
厚撫之使訶賊賊動靜希儀亦無不知每寇他所
必先至設伏要擊無不巧中希儀得賊巢婦女畜
產果鄰巢者悉還之惟取陰助賊者諸徭盡讐伏
無敢向賊希儀每於風雨晦冥夜偵賊所止宿分

遣人齎銳潛伏舍旁中夜銳舉賊大駭曰老沈來
矣咸挈妻子匍匐上山或寒凍觸厓石死爭怨悔
至曉下山則寂無人聲他巢亦然潛遣人入城探
則希儀故居城中不出也賊膽落多易面為熟狔
其渠魁宿猾先後擣巢斬馘捕誅殆盡會謝病柳
人祀之山雲祠二十六年為廣東副總兵從總督
張岳大破賀縣賊倪仲亮等瓊州五指山熟黎其
酋那燕結崖州感恩昌化諸黎為亂總督歐陽必

進議討希儀請罪止黨惡三道分兵以進乃偕叅將武鸞等直入五指山下斬那燕及其黨餘衆俘獲招降捷聞進都督同知改貴州總兵官復從岳平銅仁叛苗龍許保吳黑苗又以病歸希儀為人坦率及臨敵應變出奇人莫測尤善撫士卒常染危病卒多自戕以禱於神其得士心如此

節舊志

蔣淦字汝潔全州人正德辛未進士授兵部車駕主事有清節嘉靖初轉武選司郎中掌選軸杜絕

請托人服其公出知嚴州興利革奸四境靖肅政
暇則進弟子員辨析經義有不合親為論定嚴之
士大夫刻石記其政會遭母喪歸起補惠州政績
與治嚴同十二年陞河南左叅政值歲祲議策賑
救全活者甚衆遷廣東按察使辨冤獄懲貪暴囚
國一空十七年改江西右布政尋轉浙江左布政
擢順天府尹特疏上四事議編審以均州縣議優
免以恤凋敝議偏累以阜邦畿議修理以省民力

上嘉納以次舉行聲譽振起陞工部右侍郎以疾

卒於官

州志

陳瑀字伯玉宣化人正德癸酉登鄉書任興國教諭以節儉行慈惠士有貧者助以已齋夫銀知永春縣夙稱巖邑寇盜滋蔓瑀捍禦有方疆圉寧謐吏部考天下清官最上間判長沙府歲凶曲為賑濟民立湘水滌思碑以誌德陞雲南五司提舉界有舜塘井淡不成鹽瑀至取井水煎之復成鹽近

井民感其孚格水神立祠祀之樹碑紀其事及歸

送者無不垂涕

舊志

楊喬蒼梧人舉正德鄉書令衡陽勵節清苦改南

雄諭著有靜觀錄學道堂稿吳清惠極為稱賞

縣志

曹鶚字盤泉全州人正德癸酉鄉薦任廣東瓊州

推官政多平允郡無冤民立祠祀之遷貴州安順

知州撫蠻綏民尤多惠政

舊志

蔣彬全州人正德甲戌進士剛毅有為自刑部郎

出守廣平當事交薦其才晉秩去憲司為刻卓異
數事以風列郡仕至雲南右布政使歷官藩臬皆
有惠政鄉人稱其行誼仰之若山斗云

舊志

周昌齡字壽夫恭城人正德間明經舉鄉薦授湖
廣永州推官歷陞雲南曲靖知府以忤上官致政
歸昌齡性公直鄉人有訟多方勸諭率感化徭獍
寇掠鄉村統民兵護禦民得耕牧當道以保障鄉

閭旌之

舊志

徐乾字健夫臨桂人正德間進士知新會撫定儋
州諸黎因與約世世納稅歷廣東叅政為福建按
察使以忤直指不列薦書朝議紛然擢福建右轄
隨擢湖廣左轄用快公議云乾性行直亮多與世
忤坐靖藩親格於令甲不得內遷屢移疾乞歸湖
廣巡撫顧璘獨薦其才器可大用屬駕南狩乾竟
以忤貴人逮至京獄具罷官歸

縣志

張星字子陽臨桂人正德丁丑進士由庶吉士為

檢討編修十餘載不肯獵取聲華蔣相國冕最器
之後徙司業歷陞太常少卿遭母喪歸卒於家星
事母孝事二兄恭嘗議罷本縣役馬民甚德之

縣志

劉存仁懷集人正德己卯領鄉薦知湖廣武陵縣
有卓異才保民蕩寇百廢俱興三載薦剡丁內艱

歸課士勸農化行閭里邑人仰為模楷

縣志

何鳴鳳字如岐懷集人正德庚午歲貢初丞潮州
捕盜有功民德而祀之遷雩都令尋歸隱厚德懿

行人咸敬信

縣志

屠楷字良植號直齋臨桂人正德庚午解元嘉靖
癸未進士性孝友聞母病以部使便歸生侍湯藥
歿送含斂服除補駕部主事清廉勤慎調吏部驗
封司歷文選司郎中凡官職繁簡人才優絀得於
見聞者咸紀之於冊而高下其任先節行後才藝
抑奔競獎廉能每注選因才授職勢權請托抗論
不從陞右通政南京太僕太常卿逾年累遷南工

吏兵三部尚書考察京官去留允當參贊軍務咸
中機宜賜正二品誥命癸丑辭歸孝事繼母友愛
諸弟子姪有過必諄諄誨之勵志問學不事產業
居第僅蔽風雨撫按相繼薦之不報訃間贈太子
少保諡恭簡諭祭遣官營葬如制所著有西隱漫

藁

縣志

范輅柳州人正德間拜御史以直言謫龍州經歷
修學宮葬枯骨授生徒舉業

四川名宦志

蕭淮字東之臨桂人正德進士由行人授御史時
逆濠將作難自胡世寧范輅以疏濠狀相繼得罪
無敢言者淮具奏謂寧藩惡貫已盈後毒方潰賊
臣逆子鱗集左右往往潛詣輦轂不知何謀宜繫
治之以翦其萌並復胡世寧鄭岳官爵使之并力
討賊庶賊不久自滅奏上不數日反書聞世宗嗣
位疏論寧彬及中侍谷大用世宗雅納之時錦衣
冗員不下數千淮承旨清刷梳剔陞光祿少卿會

大同卒叛殺總兵逐代王廷議簡淮往至則謁代王故與鎮巡逐日高宴卒果來窺乃麾之入入可二百人厲聲堵立淮不為動慷慨數語二百人者受指麾聽操閱如故拜淮僉都御史巡撫延綏嚴攻守謹斥堠方大用之而訃至矣所著有麗川集

舊志

何世綸字伯起興業人舉正德己卯賢書嘗從吳清惠湛文簡遊自號心齋知英德縣有惠政祀名

宦改知古田縣調度銀礦民甚德之尋以病歸

舊志

戴欽字時亮馬平人登正德進士為刑部主事歷郎中林見素為大司寇每有大典禮大獄訟屬欽

創藁援筆立就無不允當司寇甚重之後坐議大

禮廷杖歿所著有鹿原集玉溪存藁行於世

舊志

雷顯字時新永福人弘治間貢生任廣東連州吏目性醇厚與物無競官箴自守從征有功上官重之以內艱歸引疾不復仕林下三十餘年動遵理

法非公不至官署卒年八十有餘

泰縣志

鄧祥龍崇善人幼孤貧二十一歲以糧役為邑令所笞發憤就學析薪汲水以代束脩嘗於巖穴幽僻處終歲誦讀正德間舉孝廉知寧州有惠政寧

人立祠祀之

太平府志

陽寅桂林人正德丙子舉人知臨武縣守已甚嚴嘗書天地鬼神鑒察於座右在任二年豪右反足

吏民不敢干法

湖廣名宦志

廣西通志卷七十八